

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774

10101 Lusaka, Zambia

Tel: 260-1-290410

E-mail: jctr@jesuits.org.zm

fax: 260-1-290759

web: www.jctr.org.zm

October 2006

Kufuma ku JCTR!

Tudi na muzangalu hakutemesha kutangisha kwa Adventi kwa mu 2006. Tuna kuhweleli chikupu netu kutangisha ichi cha mu Katolika kukutwisha kubombaku kulumbuluka chakutangisha chikwawu muyinu mpinji ya Adventi. Tunelukishi netu kulumbulula chenichi akuchitowesha kudi atangishi nawa nlomboli ambokamboka.

Etu tunatiyi netu kutangisha chenichi hicha kwashanga hohu muyipompeluku, ilanga yakwashanga nimuyitenti, nimumawumba awanyikwenzi, nimawumba akwawu amalombelu.

Muyinu Advent ya 2006, a JCTR anakengeshi aka kwitiya kushishinkisha hayuma yaletanga kulombola kwa kuwahi kushilahu ni kukengesha kumanisha yisela ya wupwapoki, kuleta kutiyashana, nikushakama muwumi wa lumbuluka. Ichi chitukutalanga hayuma yeniyi, twayenu twanukenu kukenga kwa Nzambi kwasonekawu mu Nsangu ya Yiwahi nawu: "Chakengeliyi Nzambi mpanta yamunu mwishina watumini mwanindi wumu hohu hakwila ezhima akamwitiya akabuli kunonga ilanga akekali na wumi wahayanyaka" (Yowanu 3: 16).

Tunahani kusakilila kudi a Fr. Evaristo Chungu, atalanga ha yuma yakutangisha mu Archdiocese ya Lusaka alongesha mazu wenawa. Kusakilila chengi kudi akashikola ha St. Dominic's Major Seminary akwashili kutuntulula mazu wenawa kufuma mwidimi da wundeli.

Etu tukwikala na muzangalalu neyi tukutiya yitongozhoka yenu hakutangisha kweniku. Ikalenuhu na mpinji yakusoneka yitongozhoka yenu hachipapilu chidi hanyima. Enu mwatela kutemesha chipapilu chenichi kuhitila ku Post Office. Yitongozhoka yenu yikutwikwasha kuwahisha nakashinshi kutangisha chakumbidi.

Neyi mudi nakukengesha chikupu akunu kutangisha enu mwa tela kututumishila hanyikanda yamalaiti: jctr@jesuits.org.zm.

Etu aka JCTR tunatumi muzangalalu waweni ni nkisu muyinu mpinji ya Adventi. Mudi mumalombelelu etu ninenu nawa mutwishi mumalombelelu enu. Lekenu kwitiya chetu chileti kwesakana.

Kusakililaku, kuwunda cha Kristu chikali nanenu!

Yami wenu,

Simson Mwale

Coordinator

JCTR Church's Social Teaching Project.

Mazu Atachi: Yelemiya 33:14–16

Mazu Amuchiyedi: 1 Atesalonika: 3:12–4:2

Nsangu Yayiwahi: Luka 21:25–28, 34–36

KULUMBULUKA MUWUMI WETU

Ayinu mpinji mwitunga detu tudi nakumona aka kulandisha kutalatala nakuhituluka hituluka muyuma yawu. Hakumana kwachaka dihu hiya shinshikishanga chikupu ya nyi tanchi yawu. Etu aka kwitiya, Adventi diyi mpinji ya kutachika chaka chachiha. Diyi mpinji ya kuditalala muwumi wetu na nshakaminu yetu na Nzambi yetu ni na wa kwetu. Ayinu himpinji yaluwi lwa Nzambi yakutwinka kuwunda himpinji yakusakula nawa – tunakuhweleli netu tukwikala na wuntwamina wawuwahi.

Mpinji yakunyima hekwawu twetezheli “anlomboli atama” kutwiyula kuhitila munzhila yatama yamakudi. Mpinji yinashiki hakwila etu tutalishi wumi wetu kudi Yesu Khristu na nsangu yindi yalala. Anlomboli zhetu ezhima anayitambiki kwikala na wumi walumbuluka ha mensu awantu ni kunabuli antu. Kulumbuluka cha wumi hikwila yuma yayiwahi neyi kosi wudi nakukumona. Ayinu yuma yatela kutwikwashaku munshakaminu yetu hakachi swezhe ana itudi na kulombola.

Mukutanga kwetu kwatachi, kaprofwetu Yelemiya hadi nakutwiswekaku. Yena wudi nakutwilezha nindi twikali antu alumbuluka. Twatela twitezhi nyichima yetu yikali matembeli a kuwaha cha Nzambi hakwila tubuli kwikala antu akudidila hanyitu.

Ayinu diyu mpinji yitwatela kubalumuka nakuleka nshidi ya chifwa hayuma ya wezhima. Hayaka wumi wetu wadinga nawu “A kangovu diwu oloka”. Nyikala yetu yina balumuki yakutwisha kushakama hohu aka ngovu -- indi chaku chetu cha kwitiya chidi kudihi. Kulumbuluka chawumi hi kumona netu antu ezhima ekali anyana ketunga dimu chakadi kumona hanyichidi, ha maheta, hela hanyidimu yamuntu. Muntu wezhima walumbuluka watongozhokanga hayuma yatama yamwekananga kudi akwawu neyi kwizhi yinanwekani hadi yena. Akunu diku kulumbuluka cha kutangisha chamu chipompelu chahoshangawu nawu “kukwatankana”. Ezhima aka kwitiya anayilezhi kusha kashinshi kudi aka ku kabakana.

Kutanga kwa muchi yedi, Pawulu naku twitangisha nindi kulumbuluka kwakeni kwamwekananga mukukwatankana. Kubula kwiluka hikunateli kutwizatisha mukubula kukwasha aka ku kabakana, mwitunga detu. Nelson Mandela watulezhanga nindi twatela kushakama naku kwatankana. “Antu ashakamanga hamu; atunyama ashakamanga hakawawu”.

Hanyima tunamoni antu adingi nakukata mwitunga detu chiyayukawu. Kakavulu akamaheta ayitwalili ku Morning Side Clinic ku South Afrika. Atuzwengi ayishili nakufwila mu yipateli yabula yitumbu natudidi. Munyikala aka mama adi na mavumu endelenga hahaleli, amakwawu afwili henohu kanda ashiki kuyipateli. Aka kuka nimanasi hiyadingi nakuzataku.

Iseki dawu Papa Yowanu Pawulu wamuchiyedi wasonekeli nindi: “Kukwatankana hikutiya hohu wushona wa makudiku mulonga wamakabi awantu. Kukwatankana hi kudishaku nakumona netu yuma yawantu yina shikizhewi.

Dalelu, anlomboli zhetu atela akwati yuma yezhima mwilunga detu; atela kuleta kuwunda na kuhoshesha nawu”, One Zambia, One Nation!” Atela aleti kudinunga hakachi kachabu, bayi kuleta kudi kenga kwa munyichiduku. Anlombi atela atwikwashi etu kudanakenga wumu na mu kwawu. Twatela kuzata chikupu nakashinshi. Twatela twahi mbutu zhitwatumbili, bayi kuhosha hohu netu “tukudya nawu”. Iku hiku kisa kuzatu kwetu nangovu nakuleta kukatala ni wukombi. Mu Nsangu yetu yaYiwahi, Mwanta Yesu nakutwilezha nindi twatela tushakami chakubula kutwisenda nayuma yamunu mwishina. Bayi twitezha

nyichima yetu yingili muyuma ya wuzondu ni ya kusheta. Ayinu yuma yatufumishanga kunyidimu yetu hanu heseki yakuleta wambu wa Nzambi.

Ayinu yuma yinateli kutwitwala kuyuma ya wuzondu yidi neyi ku kamama nanyana yanyanya hela kwingila mumabumba a satana. Pinji zhi kwawu twazatishanga wana wa Nzambi munzhila zhatama zhidi neyi kusheta nawu pwapwoki. Mu Nsangu yayiwahi tunakutiya Mwanta una kutulezha nindi "tonenu", bayi ayisendi kudi yuma yatamaku. Aka kwitiya abula kukola mpinji yezhima ayesekeka mukwila yuma yawuzondu nakukisa mpinji yawu.

Anlombi alala aletanga kwesekana. Achinu tuchdi na kuhembela kusemuka cha Mwanta twayenu tuleti kulumbuluka ni kukwatankana. Twayenu twilimu bayi kuhosha hohuku. Anukenu nenu tudi anyana evumu dimu-twatela tudilemesha umu na mukwawu.

MALWIHU MUYITENTI

- Indi yumanyi yitwatela kumona mudi inlomboli wamuwahi?
- Tukukwasha ngahi anlomboli mwitunga ni muyipompelu ekali alumbuluka?
- Tukukwasha ngahi anyikwenzi ekali anlomboli alumbuluka?

KACHISELA

Kwikali antu asatu hela awana etala dimu adilenga mulonga adi na kuyanda adi nanzala, adi na yikatu; nitala datama. Tata yawu adidilishanyi mulonga kwosi udi nakumukwashaku. Ni mfulumedi kwosi yineluku. Mukwenzi umu hakuyimona atiyiwushona enzi nakuyikwasha: ayinki kudya, atwali ayezhi kuchipateli. Antu amuhayami hakudihana chindi. Amulezhi nawu emani wukansela, hela wu MP, hela ha wu mukwetanda. "Yeyi tudi na kukenga mulonga watalanga hakukala chawantu bayi hakukala cheyiku".

MALOMBELU

- Tulombenu hakwila anlomboli aditezhi kuyi twaminina kudi Nzambi hakulama antu zhawu. *Tunalembi...*
- Tulombenu hakwila anlomboli muchipompelu alomboli antu zha Nzambi muwalala ni mu kukenga. *Tunalembi...*
- Tulombenu hakwila Nzambi avulishi kwakama kwetu, niluwi lwetu nikukwatankana umu na mukwawu nakulama atuzwengi. *Tunalembi...*

Kutanga Kwatachi: Baruch 5:1-9

Kutanga Kwamuchiyedi: Afwilipu 1:3-6, 8-11

Nsangu Yayiwahi: Luka 3:1-6

WUPWAPWOKI HINSHIDI

Ifuku dimu nendeshelenga motoka mu Lusaka na mweni ka chi pepala ha motoka yadingi hambindi yami ha sonekeluwu nawu: "Nzambi wakumonanga". Achinu chachiwahi. Ami na nukili nami ayinu mpinji anashiliku chengi nshimbi zha Nzambi zhikwawu: (11) "Neyi ana kukwati wanyi, hinshidiku". (12) "Neyi ana kukwati ditadiki chikupu".

Etu tuna moni kutama kwa wupwapwoki ilanga hitudi na kukenga kufumisha iwu chikatuku. Akulumpi a hoshanga nawu imfwa wenzhilila kudya na ufuku ukenzhlila ni na mwana. Twanukenu netu wupwapwoki wazhahanga kukenga. Hi mulonga hohu wanyi, hinshidi ya kisanga kukenga.

Kutanga kwatachi kudi nakutwanukusha naku twatela twanzanganenga wana wa muzangalalu na wakwetu kuhitila mukuvwala kulumbuluka. Nzambi hadi nakukenga nindi twikali a yipwapwokiku. Etu twatela ngahi kwikala mu kuwunda ni mu muzangalu hitudi nakuholola zhimpindi zhezshima nakushikili menna ezhima hakwila iseki desekani. Etu twatela tubalumuki nakufunta kudi yena. Kapampa kangahi kitunalengi tuwumbu na kwiimba menna hakachi ketu na Nzambi ni na wakwetu antu?

Yuma yeniyi twayilanga neyi etu tudingizha muyuma yatama yidi neyi kamina kawakwenzi ka "Munyaule", (Nguwiku hanyima, ninami niku kuwa), wukombi ni makudi. Aka mama amakwawu anadikisanga ha nyizhimba hakwila awanihu nyidimu. Aka kwingizha nyidimu niwena hiyashanga mana ku kuhanda chawa ka nyidimuku.

Yuma yeniyi yina swezhi mulonga ya wupwapwoki wa "Ndishimu". Twayenu twikali alumbuluka. Ninetu aka chipompelu, mulongadi anyana katuzwengi akanganyanga kuwana malunga mu mashikola etu? Etu twalandishanga maluunga kudi akakuheta tahindi? Etu kumana, hitudi nakukangesha anyana kutambula kutangaku? Iyi yuma hi mulonga hohu wanyi, hinshidi yakukisa kukenga.

Pawulu mukutanga kwetu kwa muchiyedi wudi na kulombelelaku aka Fwilipu nindi ekali alonga atoka nyichima. Nakulomba nidi ekali nawana wa kwiluka yuma yatama ni yayiwahi. Etu, neyi Afwilipu twatela twikali antu alumbuluka. Etu tukwikala ayinsahu amunu Mumpata. Chatama nakashi mulonga etu twakenganga hohu yuma yatutiyishanga etu kuwaha bayi aka kwitiyaku. Twavulamenaku kunshidi. Tweekalanga abula kukola muyuma ya wupwapwoki.

Pawulu na hameki aka Fwilipu mulonga wakuwaha chawu ni muchima wawu. Ninetu nawa atwiluka mulonga wa koloka swezhe mukukwasha atuzwengi. Kakavulu tunatamishi nakushika zha makudi kudi antu. Nyidimu yetu yitwaletanga hiyekala yalumbuzhoka wanyi.

Mu Nsangu yaYiwahi tunamoni kukenga kwa Nzambi. Kukenga kwindi kwabadika kuluwangesha, nikukanganya, ninshidi zhetu. Kuhitila mudi Yowanu Mupapatishu, Nzambi nakutwanukisha nindi tubalumuki. Yowanu natwilezhi nindi ololenu wumi wenu wahenga, shikilenu menna ezhima nakuleka nshindi zhezshima, nakufunta kudi Nzambi. Chalala, neyi antu akudanukisha umu na mukwawu hiyanateli kufwaku. Neyi tunakani kutiyilila tukudishanga mu kukala.

Chisemwa chidi ayinu mpinji mumukala wetu chatama chikupu. Kulema chamuntu ankuchimwena ku: (1) ambanda angahi nidi nawu (2) Walwa wungahi wuwukunwa (3) Mali angahi awudi nawu. Ayinu yuma yatama chikupu.

Ayinu yuma yaletanga hohu kuwaha ha mpinji yantesha hohu. Etu aka kwitiya, hela chochu tweluka netu Muzangalalu waweni wunatweshi hohu kuwaniwa kudi Nzambi ni mukuzatila akwetu munzhila yalonga.

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E mail: jctr@jesuits.org.zm

Ayinu mpinji ya Adventi Yowanu Mupapatishu nakutwanukisha kufuma kuyuma ya wupwapwoki nakuwahisha wuntanga wetu na Nzambi ni nawa kwetu antu.

MALWIHU MUYITENTI

- Ami na mwenagahu nzoo neyi kudi yuma yawupwapwaoki mwilungu detu, muchipompelu, hela kunyidimu? Indi hekwawu na mwenanga hohu? Kangahi?
- Nayakulanga ngahi antu anhosheshanga hayuma yawupwapwoki?
- Nayanga kangahi ku nsakalamenta ya chilapilu? Yumanyi yinakengaku ku Nsakalamenti? Yumanyi yinahelelaku?

KACHISELA

Kwikali kadimbumba kanyanya. Muntu wumu alamenga mali. Akisangani mali. Imbumba difwi, antu atachiki kuyanda. Atupokola enzi amukwatiwu ikombi, a mukasi hamu ni antanga zhindi. Antu ezhima atiyi nachu kutama mulonga amwenenga ilanga kwosi zhiyeliliwu. "Etu twatamishili".

MALOMBELELU

- Tulombenu mulonga Nzambi atwikwashi kwikala antu alumbuluka, abula wupwapwoki. Tudikengi wumu namukwawu. *Tunalembi...*
- Tulombenu hakwila alomboli ezhima ekali akuhoshelaku ana anakanganyi aka kuyihoshela. *Tunalembi...*
- Tulombenu hakwila yitenti yetu yikali yakutambula angezhi nakwila yuma yayiwahi chakubula kukuhwelela kuyifweta, chengi nawa hakwila twikali akuleta chikuhwelela ni kuwunda kudi ana adi mukukala. *Tunalembi...*

Kutaŋga Kwatachi: Zefwaniya 3:14-18

Kutaŋga Kwamuchiyedi: Afwilipu 4:4-7

Nsangu Yayiwahi: Luka 3:10-18

KWITEZHA KUDANAKENA NAKUTIYAŊGANA

Nzambi yetu hi Nzambi wabadika kuluwaŋgesha kwetu ni nshidi zhetu. Nzambi wudi nakutu keŋgakeŋga nakutu hembela nindi atwanakeni. Yena wudi nakukeŋga nindi tudanakeni wumu namukwawu hakwila ituŋga detu ditachiki kukwatankana nayena.

Kutaŋga kwetu kwatachi ku natulezhi ochu Nzambi chadi nakutuhembela nindi atwanakeni. “Zaŋgalalenu nakuwahilila enu anyana ka Yelusalema! Nzambi nayanakeni Nyiloŋga yenu.” Iwu mwaka wunamani hekawu twadi katishili kunyichima na wa kwetu; ayinu mpinji anatwilezhi kudanakena. Twayenu tumanishi nyilonga yetu nawa kwetu henohu chimishimmishi kanda.

Mukulumpi wumu wachipompelu kwituŋga da South Africa, Shikofu Desmond Tutu wahoshili nindi “Neyi kudanakena kwosi, nimbidi nawa kwosi.” Chalala etu tweluka netu kudanakena kwaleteshaŋga kutona na kukula.

Anlomboli zhetu amu chikuhwelelu atela atwishi munzhila ya kudanakena kuhitila muyitoŋgozhoka yawu nimuyilwilu yawu. Neyi chanahoshiyi Pawulu kudi aka Fwilipu, muntu wezhima akengeshi muzangalu nikuwunda hakachi ka wantu. Akunu diku kulomba kwa Pawulu: Muzangalu wuvuli kudi aka Fwilipu.

Chalala, hitukutewesha kwikala na kuwunda hela na muzaŋgaluku neyi etu kudanakena nehi. Anlomboli zhetu atela amweshi wunsahu nakutulezha atwinki wana wa chimishimishi -- adanakeni umu namukwawu neyi chinatwesheki. Hampinji ya ma kampeini kwadingi kuhoshahosha nakuditukola nakuditiyisha woma. Lelu dinu twatela tuyi hambidi neyi ituŋga – “One Zambia, One Nation. Twayenu wezhima wetu tudanakeni nakutiyaŋgana.

Akunu kudanakena kwendelaŋga hamu nakubalumuka. Kubalumuka mumuchima, muyilwilu nimunshakaminu. Neyi tukukana kudanakena etu tudi nakuzhiha wunlomboli wetuŋga. Nshidi zhezhi zhididi neyi kudikeŋga hanyichidi twatela tuyileki. Ayinu himpinji ya kudinyeka nyinuku hela yakuditopekaku.

Etu hitwatela kwikala neyi ampombu adisehaŋga mahandawu wanyi. Etu wezhima twaluwaŋgeshaŋga mpinji yayivulu. Mpinji yakudanakena diyu ayinu. Twayenu tulondelenu yatutaŋgishaŋgayi Kristu.

Muyinu mpinji ya Adventi, anatwanukishi kwikala kwaka mwahi nawatuzwengi. Twayenu tudanzaŋgeni yuma na watuzweŋgi. Chalala etu tudi na mudimu weneni wakumona netu atuzwengi niwena atela kutiya kuwaha. Mu Nsangu ya yiwahi, Yowanu Mupapatishu nakulezha akakuzata nindi atela kwikala awalala. Atela kuzata na kashinshi, namana ninawalala. Yena nalezhi chikupu akanyisonku ni amashidika, Ilaaŋga awa himazu kudi muntu wakazhima wudi hanyidimu. Etu twazatishaŋga ngahi nyidimu yetu?

Chekala chatama chikupu hakutiya nawu akanyidimu amakwawu adi namali amavulu nankashi mulonga wakuzatisha nzhinzhila zhawupwapwoki. Atela kwikala ŋgahi na matala amaneni, kwendesha nyotoka yawuseya, kuvwala yakuvwala ya wuseya, kwenda mumatuŋga acheŋgi? Iyi yuma neyi kuhosha muwalala hiyanateli kuyitweshaku.

Kakavulu tweluka netu antu adi hanyidimu azatishaŋga nyidimu yawu nakukabakesha antu a longa a mwitunga. Ni akwetu afuma mumatuŋga acheŋgi muloŋga wanzhita ayikabishilaŋga kumu. Neyi adi nakukeŋga kutachika zha kulandishalandisha ayilezhaŋga kufweta mali anashiki ha 25,000 US dollars ni

2 million kwacha hakwila ayitezhi. Ana adi nakukeŋga kutaŋga shikola nawu chiŋga afweti K500,000. Akuyiwana kudihi?

Hampinji yakunyima natiyaku nawu kwadi kansi wamubanda waku Congo wayaka 14. Yena hi mukashikola ku Lusaka. Mama yindi wadiŋi nakukata nankashi. Iwu kansi amuwanini wudi nakulandisha tuyuma twindi kudi atupokola. Amukwachili naku musha mukaleya muloŋga hadiŋgi na musonkuku. Washakamini mukaleya mulungu wumu ni mafuku anti. Hayileŋga kushikolaku; kwosi wahembelenga mama yinduku. Idi mali akushika ku 25,000 US dollars ni 2 million kwacha wadi kuyiwana kudihi? Aka, enu akwetu, twayenu twikali antu aluwi!

Antu ezhima, ninana akakuleŋga nshimbi atela kwikala antu awalala na luwi neyi chadi na kutulezhayi Yowanu Mupapatishi. Kukeŋgesha ngovu na wukombi hikunatweshi kukwashaku; iluŋga hela ituŋga detu hi kutonaku. Muyinu mpinji ya Adventi, wezhima wetu anatwitambiki kudishiŋga nakuleka nshidi zhetu. Twatela tutachiki kutiyaŋgana na Nzambi nina wakwetu antu. Mulonga wayitoŋgozhoka yetu antu akatwiluka neyi tudi Akristu tahindi nehi.

MALWIHU MUYITENTI

- Yumanyi yaletshaŋga antu ekali nawupwapwoki mwiluŋga detu hela muchipompelu?
- Neyi nidi inlomboli nazatishaŋga ŋgovo zhama kuchinyisha nakukabisha akwetu tahi?
- Yumanyi yinawanaŋga neyi ina kukeŋga kuleta kudanakena nakutiyaŋgana mwilunga? Ami nakeŋga kuleta kutiyaŋgana tahi?

KACHISELA

Kwikali antu ayedi emeniku mapati awu. Ona yiyanasakuluwu ninona yiyana buli kusakula. Wezhima wawu adanakeni hamensu awantu mulonga aletesheli kudikeŋa kwanyichidi, chenŋi nawa aditukili. Adi kumbati. Kwikali kamina wa kudanakeŋga. Antu abidikaŋga: "Neyi kudanakena kwosi; mbindi kwosi."

MALOMBELU

- Tulombenu Nzambi atwinki ngovu ya kwitezha kuluwangeshi chetu mu mpinji yitunakatishi akwetu mukuhosha ni mukwila. *Tunalembi...*
- Tulombenu Nzambi atwanakeni hampinji twaleteli kudambula mwilunga detu muloŋga wakudikeŋga. *Tunalembi...*
- Tulombenu Nzambi atwinki ingovu zhakuhoshelaka anabuli ngovu mwituŋga. *Tunalembi...*

Kutaŋga Kwatachi: Mika 5:1-4

Kutaŋga Kwamuchiyedi: Hebelu 10: 5-10

Nsaŋgu Yayiwahi: Luka 1:39-44

WUNLOMBOLI KUHITILA MUKUZATA

Dalelu hi Mulungu wamuchiwama wa Adventi. Katataka tukwanukaŋga kusemuka cha Nkuuli, Mwanta wa kuwunda, Yesu Kristu. Tunanuka netu yaka yayivulu yina hitihu wasemukili hakachi ketu, wadilishili kwikala muntu nakudikehesha na kwinza nakushakama heseki. Tuneluki netu yena wudi nanetu mafuku ezhima mukushakama kwetu na wakwetu antu. Chimishimishi hichidika hohu chayaka chakwituŋga dacheŋgiku; chatwanukishaŋga nawu Kristu wudi hakachi ketu dalelu mwituŋga detu muchinu chaka. Mika mukutaŋga kwetu kwatachi natwanukishi nindi Mesiya wukwinzhila muchisaka cha Mwanta Davidi, ilanga wukekala wadizoza. Chalala, kudizoza diku kwakeŋgekaŋga mudi inlomboli wezhima. Kudizoza dikukwafumaŋga kuwaha chezhima. Inlomboli wadizoza weluka hakumina ŋgovu zhindi ni nohu hakumina kovwaha chindi.

Mumafuku a Mika, anlomboli amavulu akeŋgeli nankashi maheta niŋgovu ha matanda. Hiyashili mana kudi atuzweŋgiku; akabakesheli antu amavulu chikupu. Mbaka ya Yerusalemu yenzeli nawanlomboli akeŋgeli nankashi ŋgovu. Mika nashiki nindi Nzambi wamba katuma nlomboli kufuma mudi antu yena wakekala mwanta wa kuwunda. Wakenza na kubinga Nyikoku yindi.

Mwituŋga detu tunamoni anlomboli akeŋgesha chikupu mali niŋgovu zhatama. Anu antu diwu aleteli kwabuka chanyichidi tuchidi natu. Tunamoni anlomboli akeŋgaŋga kuyandisha akwawu. Tunamoni antu antesha kukabakesha antu amavulu. Ichi chatama. Chinaleti antu kubula kushaku mana kuyuma yetuŋga.

Chalala mazu a Mika analumbuluki. Wudi nakutwanukisha ochu chitwatela kulondela Kristu munzhila yawunlomboli. Kristu Kabiŋga wadizoza wudi nakwinza na kukula antu nakuyileta hamu. Yena diyi Mwanta wa kuwunda.

Mukutaŋga kwetu kwamuchiyedi anatwilezhi nawu mudimu wa Mesiya wekala kwila mwayila Muchima wa Nzambi. "Yamonu Mwanta, Nenzi nakwila mwaya muchima weyi!" Anlomboli alala atela ekali akulemesha Nzambi. Atela kovwahila Nzambi kuhitila mukuzatila akwawu muwalala. Wena hiyakwashaŋga holu akwawuku, atela adi hani chikupu kudi akwawu. Anlomboli amavulu emenaŋga muloŋga wa chisela cha "tudi nawu." Iwu hiwukombi.

Achinu chatama nankashi neyi anlomboli wenawa aditiya. Ekali ni azuwa. Hiyatilyililanga kuyitoŋgozhoka yawakwaku. Mana awu ezhima ekala kuŋgovu na mali ni kuyitoŋgozhoka yawu. Avulamenaŋga nawu "neyi wunakandami kumutonde bayi wutuka antuku mulonga neyi unaholoki kwosi uku kwashaku." Inlomboli walala walemshaŋga antu zhindi nakuyikuhwelela. Chalala anlomboli alemshaŋga antu niwena ayilemeshanga. Ninana adilemesha ayilemeshaŋga.

Mu Nsangu yayiwali, Nzambi nalemeshe inlomboli walema chikupu, wamubanda wezhina da Maliya. Yena nazatiku kuyuma yawamwinu wa wantu muloŋga wa kwitezha chindi chakwila mwaya muchima wa Nzambi. Achinu china muleteshi kwikala Inlomboli walala muloŋga wakaleta Yesu kudi antu.

Ayinu mpinji yakuswina kukamwihi na chimishimishu twayenu tusakilili Nzambi nakulemesha Maliya hakwitezha kwikala Mama ya Chamwinu Chetu Yesu. Nakudizoza chindi netezhi kuzataku mudimu wa wamwinu. Neyi Nzambi wetezheli mukamama kuzataku mudimu walema chikupu, indi etu yikahi yitwakabakeshelaŋga aka mama nakuyilekelesha inkawawu?

Etu akakwitiya twa tela kwinka aka mama nyidimu ya wunlomboli munyikala yetu. Nzambi yamweni wetezheli aka mama kuzata yuma yamaneni ha wulwilu. Tweluka netu akamama azataŋga chikupu nakuleta kuwunda mwituŋga mulonga wena diwu antaŋgishi atachi. Yesu wavwalikili muntaŋga ya wantu, washakamini neyi muntu hamu nawa mwali zhindi- a Yosefwa na Maliya. Neyi tunatiyi mazu amu Nsangu yaYiwahi kufuma kudi Yesu twanukenu netu nsangu zhikwawu zhenizhi wazhitiyilenga kudi amvwali zhindi.

Chalala, amvwali ezhima atela eluki nawu chisaka diyushikola yalala ya wunlomboli. Anyana atangilaŋga nyidimu yawunlomboli walala kufuma kudi amvwali zhawu – nlomboli washaŋga mana kudi antu zhindi. Tuneluki netu ayinu himpinji yakala, ilaŋga amvwali bayi ashiya anyanaku muloŋga wa kukengakenga mali. Wana wutwatela kwinka anyanetu chiŋga yowu kwikala nawu mpinji yayivulu. Yumiyi yikwikala yayiwahi bayi kudi anyana hohuku ilaŋga nikudi ituŋga dezhima.

Twayenu tuzati hamu hakwila “One Zambia, One Nation” yilumbuluki Tuhanenu yuma yayiwahi kudi anyana. Kwila chenichi tukufumisha kudikeŋga munyi chidi na wukombi. Anlomboli amawahi an elukisha yuma azatilaŋga antu zhawu. Anlomboli diwu awa: amvwali, akamfulumendi ni akakulandisha.

MALWIHU MUYITENTI

- Tenenehu anlomboli amawahi itwa monahu dehi mwituŋga hela muchipompelu. Yumanyi yinamona mudi Wena.
- Ami nidi inlomboli wekala nawantu amavulu tahi? Ankuhwelela? Indi kwizhi nayikabashaŋga?
- Natela kulekesha ŋgahi kukabisha akamama mwilunga, nakuyisha ha wunlomboli?

KACHISELA

Kwikali antu ayedi iyala ni mubanda. Akengi kwimana hawunlomboli muchitenti. Antu ahoshihoshi, amoni yuma yamuchidinyi yitwatela kusendahu: walala, kudizozo, mana, kuzata, kuzatila akwawu. Mubanda ekali nayumiyi. Amusakuli. Ezhima atiyi kuwaha, amusakilili.

MALOMBELU

- Tulombenu Nzambi atwinki anlomboli amana atwilomboli na kudizozo ni na kukeŋga. *Tunalembi...*
- Tulombenu Nzambi atwinki ngovu zhakumona yuma yatela kuleta aka mama mwiluŋga detu. *Tunalembi...*
- Tulombenu Nzambi atwinki Spiritu Wazhila akiswili yisaka yetu hakwila yikali mashikola amawahi akutaŋgila ku unlomboli walala. *Tunalembi...*